

यसवने ऽन्वाह न्यूनाद्वै प्रजाः प्रजायन्ते. तद्यदेतानि केवलसूक्ता-
न्यन्वाह यजमानमेव तद्रर्भं भूतं प्रजनयति यज्ञाद्देवयोन्यै. ते
हैके सप्त सप्तान्वाहुः. सप्त प्रातःसवने सप्त माध्यंदिने सप्त
तृतीयसवने; यावत्यो वै पुरो ऽनुवाक्यास्तावत्यो याज्याः. सप्त
प्रांचो यजन्ति सप्त वषट्कुर्वन्ति. तासामेताः पुरो ऽनुवाक्या इति
वदन्तस्तत्तथा न कुर्याद्यजमानस्य ह ते रेतो विलुपन्त्यथो यज-
मानमेव, यजमानो हि सूक्तं, नवभिर्वा एतं मैत्रावरुणो ऽस्माल्लो-
कादन्तरिक्षलोकमभि प्रवहति. दशभिरन्तरिक्षलोकादमुं लोक-
मभ्यन्तरिक्षलोको हि ज्येष्ठो नवभिरमुष्माल्लोकात्स्वर्गं लोक-
मभि. न ह वै ते यजमानं स्वर्गं लोकमभि वोळ्हुमर्हन्ति ये सप्त
सप्तान्वाहुस्तस्मात्केवलश एव सूक्तान्यनुब्रूयात् ॥ ९ ॥

अथाह यदैन्द्रो वै यज्ञो ऽथ कस्माद् द्वावेव प्रातःसवने प्रस्थिता-
नां प्रत्यक्षादैन्द्राभ्यां यजतो होता चैव ब्राम्हणाच्छंसी च? इदं
सोम्यं मध्वति होता यजति. इन्द्र त्वा वृषभं वयामिति ब्राम्हणाच्छंसी.
नानादेवत्याभिरितरे कथं तेषामैन्द्रो भवन्तीति? मित्रं वयं हवामह
इति मैत्रावरुणो यजति; वरुणं सोमपीतय इति यद्वै किञ्च पी-
तवत्पदं तदैन्द्रं रूपं तेनेन्द्रं प्रीणाति. मरुतो यस्य हि क्षय इ-
ति पोता यजति. स सुगोपातमो जन इतीन्द्रो वै गोपास्तदैन्द्रं
रूपं तेनेन्द्रं प्रीणाति. अग्ने पत्नीरिहावहेति नेष्टा यजति. त्वष्टारं सोम-
पीतय इतीन्द्रो वै त्वष्टा तदैन्द्रं रूपं तेनेन्द्रं प्रीणाति. उक्षान्नाय वशा-
न्नायेत्याग्नीध्रो यजति. सोमपृष्ठाय वेधस इतीन्द्रो वै वेधास्तदैन्द्रं
रूपं तेनेन्द्रं प्रीणाति. प्रातर्यावभिरागतं देवेभिर्जन्यावसू, इन्द्राग्नीः
सोमपीतय इति स्वयं समृद्धाछावाकस्यैवमु हेता ऐन्द्रो भवन्ति.